

Anjuran Mengadakan Persidangan-persidangan Kemuncak Seluruh Negara-negara Islam

Seluruh kerajaan-kerajaan Arab telah beberapa kali mengadakan sidangnya untuk menjaga maslahat negara-negara itu daripada ancaman Komunis (Yahudi) dan penjajahan. Melihat kepada perkembangan-perkembangan yang demikian maka timbul fikiran dan pendapat iaitu telah tiba masanya untuk mengadakan persidangan-persidangan kemuncak bagi ketua-ketua negara Islam di seluruh dunia untuk menjaga maslahat dan kedudukan bersama serta mengingat lebih teguh persaudaraan Islam dan bantu-membantu di antara satu dengan lain. Dalam masa yang akhir-akhir ini seruan itu telah disampaikan oleh Presiden Kerajaan Somali. Tetapi seruan yang serupa itu bukanlah yang pertamanya bahkan sebelum itu telah ada ura-ura mengadakannya yang dianjurkan oleh *President Gamal Abdel Nasser* (bagi Republik Arab Bersatu), al-Malik Saudi bagi kerajaan Arab Sa‘udiyyah dan Ghulam Muhammad bagi kerajaan Pakistan, tetapi berhubung dengan wafatnya Ghulam Muhammad maka Pakistan tidak meneruskan cita-citanya itu dan yang demikian tertinggallah persoalan itu beberapa lama. Yang demikian kembali ditimbulkan oleh Somali dan mendapat perhatian besar daripada Jalālah al-Mu‘azzam Faisal bagi kerajaan ‘Arabiyyah Sa‘udiyyah yang menyatakan demikian ini di dalam ucapannya di Khartoun (Sudan) dalam masa melawat ke sana di dalam bulan March yang baru lalu ini.

Kongres Muslimin di Mekah (Muktamar Alam Islamiah) di Mekah telah mengambil atau memangku. Dan ini untuk mengusahakan satu persidangan dunia Islam yang dicita-citakan itu. Ini terang dijelaskan di dalam ucapan al-Malik Faisal itu.

Di dalam titahnya tatkala menyambut alu-aluan penerimaan dan sambutan seluruh rakyat Sudan di Khartoum di atas lawatan rasmi baginda, baginda menyatakan kegembiraannya atas sambutan-sambutan itu dan menyampaikan rasa terima kasih atas diri baginda sambil menyampaikan perasaan mahabbah dan kasih sayang umat Islam di Mekah, Madinah dan dari seluruh kerajaan ‘Arabiyyah Sa‘udiyyah dan timbul dari sanubari kepada umat Sudan yang disatukan oleh Persatuan Islam dan Persaudaraan Umat Arab.

“Di dalam pertemuan ini adalah menjadikan beta bersukacita sekiranya dibenarkan membuka tudung yang menyelubungi pandangan atau konsep mengenai rejim

pemerintahan Islam dan pergerakan Islam, kerana beta ingin menerangkan kepada saudara-saudara beta, bahawa sangatlah penting untuk berjuang dengan semangat Islam untuk mencapai persefahaman dan kerjasama atas nama Tuhan untuk kepentingan negeri-negeri kita dan umatnya. Sebagai seorang Islam maka wajiblah bagi kita beriman kepada Tuhan, kitab-Nya dan Islam. Pada masa yang lampau kita telah diabui dan ditipu oleh dunia luar mengenai dengan seruan yang kita sampaikan kepada Islam dan umat Islam iaitu bersefahaman dan kerjasama dan berkenal-kenalan. Kita tidak berbuat sesuatu apa pun kalau ianya tidak membawa ke arah kepentingan negara kita.

Seterusnya baginda menyatakan kesedaran akan adanya tenaga-tenaga yang menentang Islam iaitu imperialism, Zionisme (Yahudi) dan Komunis. Mengenai imperialis, dia menentang seruan Islam kerana mereka mengetahui bahawa Islam adalah suatu agama kesedaran perdamaian, berkasih

sayang dan persamaan. Rancangan-rancangan *imperialist* ialah untuk memperoleh kekuasaan atas negeri-negeri lain dan akan menguasainya dengan berbagai-bagai cara.

Zionis telah mengetahui bahawa Muslimin seluruhnya menghalang merebaknya pengaruh Zionis di seluruh negeri Islam, di tanah orang Arab, di tanah nabi-nabi dan di tempat kiblat yang pertama daripada dua kiblat. Zionis takut akan kesatuan Islam kerana menghambat perluasan pengaruhnya. Tidaklah hairan kita halau¹ orang-orang Yahudi berjuang untuk menentang seruan kita kepada Tuhan.”

Komunis pula titah baginda seterusnya, menentang seruan kita kerana mereka berfaham tidak mempercayai Tuhan, menghancurkan kemanusiaan sebagai manusia dan kemanusiaan perikemanusiaan sebagai seseorang.

Kita tidak mengendahkan pengaruh Komunis ini. Kita sentiasa berjuang dengan iman kepada Tuhan. Kita tidak mengizinkan pencerobohan kepada sesiapa jua pun dan kita tidak menceroboh negeri-negeri yang bukan Muslim yang juga percaya kepada Tuhan. Tetapi kita menyeru kepada sekalian Muslimin menyatakan persaudaraan mereka, bergerak dan bersefahaman di dalam menyempurnakan kepercayaannya dan kebijakannya.

Sebagaimana seruan kita kepada rundingan puncak Muslimin, beta ingin menerangkan persoalan ini. Seruan ini timbul dari seorang saudara yang beriman kepada Allah dan melepaskan diri daripada penjajahan iaitu dari Tuan Yang Terutama *President* Somali. Kita menyokong cadangan ini dan Kongres Muslimin di Mekah telah menyetujuinya. Seruan ini meminta kaum Muslimin mempertahankan agamanya dan menghendaki kerjasama dalam hal ini. Kongres ini ditaja oleh *President* Gamal Abdel Nasser, Yang Dipertua Negara-negara Arab Bersatu, Jalālāh al-Malik Saudi dan oleh Almarhum Ghulam Muhammad Yang DiPertua

negara Pakistan. Mereka telah bersetuju menubuhkan kongres itu dan telah pun berjalan beberapa tahun tetapi setelah meninggal *President* Ghulam Muhammad, Pakistan mengosongkan tempatnya dalam kongres itu dan kerjasama di antara Mesir dengan ‘Arabiyyah Sa‘udiyyah berjalan pula beberapa tahun.

Oleh yang demikian anjuran yang diucapkan oleh saudara kita *President* Somali itu bukanlah cadangan yang pertama. Beta perlu menjelaskan kepada saudara beta di dalam negeri ini yang terikat dengan perikatan darah, persaudaraan, agama dan bahasa supaya dapat memaham tujuan-tujuan yang hendak kita capai. Tujuan kita tidak ada sesuatu selain daripada keamanan dan berkasih sayang dan tidak sekali-kali penindasan dan menyerang.

Beta ulangi ucapan terima kasih atas sambutan yang diberikan kepada beta dengan kasih mesra. Beta berdoa kepada Allah membantu kita. Beta berjanji bahawa beta bersetuju apa yang disebut oleh Yang DiPertua yang budiman: Bahawa kita hendaklah bekerjasama di dalam ekonomi dan kebudayaan dan dalam lapangan yang lain bagi kebajikan masyarakat dan bangsa. Beta berdoa bersungguh-sungguh kepada Allah supaya cita-cita kita termakbul.

Amir Kuwait telah mengeluakan perintah untuk membeli dua bidang tanah di Mekah dan di Madinah kerana membangunkan bangunan untuk perumahan orang-orang haji dari Kuwait. Tanah itu berharga 300,000 Pound Kuwait yang dibayar dari wang baginda sendiri. Bangunan akan siap pada tahun hadapan.

* * *

180 orang telah meninggal dunia terbit dari bah besar di bandar Maan, 110 batu jauhnya dari bandar Amman.

¹ Perkataan sebenarnya ialah kalau.